

# Basarri'ri erantzuna

*Orain illabete batzuek Basarri Jaunak ANAITASUN ontan «Aitonaren mal-koak» argitaratu zituan bertsoan. Basarri Jaunak bere inguruan akats batzuek ikusten noski eta aien iturburu neskak zirala esan. Emakumea beti biotzbera, baiña beko bertso oiek atera dituan neska ere. Min eman omen diote Basarri Jaunaren bertsoak eta bere biotza minpe ortan zegoan bitartean begira zer dion.*

Basarri jauna, zuk badaukazu  
aiton bat maite dezuna  
zeuk diozunez berakin oso  
sarri tratatzen dezuna  
eta zuk ontzat ematen dezu  
arek esaten dizuna.  
Irakurrita daukat nik ondo  
bertsotan jarri dezuna.  
Amen dijoakizu, ba, orain  
neskatx baten erantzuna.

Emakumeak utzi gaituzu  
oso okertzat artuta  
munduan diran zorigaitz danak  
gure lepora botata.  
Gizasemiak ote dauzkatzu  
oso santutzat artuta?  
gai onen kontra zer esanikan  
etzait neri orain falta  
**BIOTZA NOLA JARRIA OSO  
DAUKATEN MINBERATUTA**

Bizio txarrik asko badago  
gizasemien artian  
begiratzia naikoa dezu  
auzo-taberna atian  
egunero an ikusten dira  
pozik asko zurrutian  
jakiñagatik ori dutela  
bere buruen kaltean.  
Ez dira ala ere geldituko  
patrikak ustu artian.

Igande goiza etorri eta  
beti gauza bat buruan:  
denborik ezin pasa degu-ta  
aurrera «txikiteuan».  
Eguardirako jarriko dira  
ganberruaren moduan;  
izkuntza ederrik entzungo dezu  
gero beren inguruan.  
Nik ezin neurtu oitura orrek  
ze kalte egiten dituan.

Nobelak ere ikusten dira  
gaur askotxoren eskutan  
esango nuke emakumeak  
aña badirala ontan  
zenbat gastatzen duten ez jakin  
zigarro eta zinetan;  
jokuan berriz zer esanik ez  
taberna eta plazetan.  
Miseriarik ez da faltatzen  
gero fameli askotan.

Norainai jua nai dutenian  
ez dute falta dirurik;  
emakumeak ibilli bear  
zorrak ordaindu eziñik.  
Etxian falta dan gauzogatik  
ez dutelako ajolik  
**NESKATXAK!**, garai datorrenian  
ez galdu zuen zentzunik  
orrelako bat lagun artuta  
ez dagolako gauz onik.

**Oikina'ko neska**